

四庫全書

子部

欽定四庫全書

古今事文類聚前集卷五十四

宋 祝穆 撰

喪事部

弔慰

羣書要語知生者弔知死者傷知生而不知死弔而不

傷知死而不知生傷而不弔

曲禮

死而不弔者三

謂輕身之孝也

畏

人或以非罪攻已不能以說之死之者

厭行上

危險溺船檀弓

行弔之日不

飲酒食肉焉

同上

弔於人是日不樂

同上

凡民有喪匍匐救

之

卽谷風

弔生不及哀非禮也

左傳

臨喪不哀吾何以觀之

哉

語三

子食於有喪者之側未嘗飽也羔裘玄冠不以弔

語

子於是日哭則不歌

語十

天子臨弔君使人弔致命曰君聞子喪使某弔如何不

淑主人哭拜稽首成踊

士喪禮

君臨臣喪乃祓殯注蓋祓

除凶邪

左傳

古今事實

人哭亦哭

老聃死偃然寢於巨室而我噉噉然隨而哭之人哭亦哭人號亦號

哭之慟

顏淵死子哭之慟從者曰子慟矣子曰非夫人之為慟而誰為

哭於中庭

孔子哭子路於中庭人有弔者而夫子拜之

檀弓

齊哀往弔

子張死曾子有母之喪則齊哀而往哭之或曰齊哀不

以弔曾子曰我弔也與哉

檀弓

弔於其室

齊侯遇杞梁之妻於郊使弔之辭曰有先人之敝廬在

下妾不得與郊弔齊侯弔於其室

左襄二十三年

出弔東郭

孟子將朝王王使人來對曰不幸而有疾不能造朝明

日出弔於東郭氏公孫丑曰昔者辭以疾今日弔或者不可乎曰昔者疾今日愈如之何不弔

公孫丑

弔不與言

公行子有子之喪右師往弔孟子不與右師言右師不悅曰諸君子皆與驩言孟子獨不與驩言是簡驩也孟子聞之曰禮朝廷不歷位而相與言不踰階而相揖也

我欲行禮子教以我為簡不亦異乎

離婁

百官會弔

孔光薨公卿百官會弔

赴者三萬

陳寔字仲弓卒于家大將軍何進遣使弔祭海內赴者三萬餘人制衰麻者以百數共刊石立碑謚為文範先生

生芻一束

徐穉字孺子郭林宗有母憂穉往弔之置生芻一束於廬前而去衆怪不知其故林宗曰此必南州高士徐孺子也詩不云生芻一束其人如玉吾無德以將之

青蠅弔客

吳虞翻放棄南方云自恨疏節骨體不媚犯上獲罪當
長沒海隅生無可與語死以青蠅為弔客使天下有一
人知己者足以不恨

誅者四十人

郗超死之日貴賤操筆為誅者四十餘人

晉中興書

弔客化鶴

晉陶侃為江夏太守母憂去職有二客來弔不哭而退

化為雙鶴沖天而去

弔其子沒

王愆期謂陶侃曰賢子越騎酷沒天下為公痛心况慈

父情耶

世說

門無雜賓

王祥之薨奔赴者非朝廷之賢則親戚故吏而已門無

雜弔之賓

本傳

西門慟哭

謝安既葬羊曇至西州門慟哭而去

名士獨弔

陳寔弔張讓

見避禍門

鼓琴而哭

顧榮素好琴張翰哭之上床鼓琴數曲撫琴而嘆曰顧彥先能復賞此否因又哭不弔喪主而去

弔作驢鳴

王仲宣祭好驢鳴既葬文帝臨其喪顧謂同遊曰王好

驢鳴可作一聲送之坐客皆作驢鳴

世說

孫子荆楚有才

少所推服唯雅敬王武子濟武子喪時名士無不至者
子荆後來臨尸慟哭賓客莫不垂涕哭畢白靈床曰卿
嘗好我作驢鳴今我為卿作體似聲真賓客皆笑孫舉
頭曰使君輩存令此人死

哀棟梁折

衛洗馬玠亡葬南昌城許徵墓東玠之薨謝幼輿發哀
於武昌感慟不自勝人問子何恤而致哀如是荅曰棟

梁折矣何得不哀

客哭主不哭

阮步兵籍喪母裴令公楷往弔之阮方醉散髮坐床箕踞不哭裴至下席哭弔唁畢復去或問裴凡弔主人哭客乃為禮阮既不哭君何為哭裴曰阮方外之人故不崇禮制我俗革中人故以儀軌自居時人以為兩得其中

奔喪得罪

吉黃為長陵令時科禁長吏擅去官而黃聞司徒趙溫薨自以為故吏奔喪為司隸鍾繇所收遂伏法死

魏常林傳

自哭亡妾

宋劉德願為孝武狎侮殷貴妃薨上與羣臣至墓謂德願曰卿哭貴妃若悲當厚賞德願應聲號慟上悅以為豫州刺史又令醫術羊志哭殷志亦嗚咽人問卿那得此副急淚志曰我爾日自哭亡妾耳

含辛為淚

符后死慕容熙制百僚於宮內哭使有司按驗無淚者罪之羣臣莫不含辛以為淚

通鑑

匍匐以弔

陳烈福州人以鄉行稱尤為蔡君謨所知然烈行恠多偽蔡君謨母死烈往弔自其家匍匐而進人問之曰此詩所謂凡民有喪匍匐救之者也其所為類如此

石林燕語

朝服不弔

丁晉公謂言嘗見常武太原王公言先太師傾背時朝

賢來相弔朱紫盈門惟徐左省鉉獨攜一麻袍角帶於客位內更易後方入相弔以此知士大夫具朝服臨哀弔問深不可也先太師即兵部侍郎祐也

談錄

辯哭則不歌

司馬溫公薨當明堂大饗朝臣以致齋不及奠肆赦畢蘇子瞻率同輩以往而程正叔固爭引論語子於是日哭則不歌子瞻曰明堂乃吉禮不可謂歌則不哭也正叔又諭司馬溫公諸孤不得受弔子瞻戲曰頗可謂廢

槽鄙俚叔孫通聞者笑之

孫公談圃

屍諫

以下係君臨喪

衛靈公時蘧伯玉賢而不用彌子瑕不肖而任事大夫史鰌患之數以諫不聽史鰌病且死謂其子曰我生不能正君者死不當成禮置屍北堂足矣史鰌死靈公往弔問其故具以父言對靈公蹶然易容曰夫子死以屍諫可謂忠不衰矣於是召蘧伯玉而進之以為卿退彌

子瑕徙喪正堂成禮

新序

為誄以弔

魯哀公誄孔丘曰天不遺耆老莫相予位焉嗚呼哀哉

尼父記

素服以臨

祭遵卒帝愍悼之尤甚喪至河南縣詔遣百官先會葬
車駕素服臨之望哭哀慟每嘆曰安得憂國奉公之臣
如祭征虜者乎

涕淚成冰

羊祜卒武帝素服哭之甚哀是日天寒帝涕泣霑鬚鬢
皆為冰焉南州人征市日聞祜喪皆號慟罷市巷哭者
聲相接吳守邊士亦為之泣仁德所感如此

古今文集

雜著

歐陽生哀辭

并序

韓愈

歐陽詹世居閩越自詹已上皆為閩越官至州佐縣令
者累累有焉閩越地肥衍有山泉禽魚之樂雖有長材

秀民通文書吏事與上國齒者未嘗肯出仕今上初故
宰相常袞為福建諸州觀察使治其地袞以文詞進縣
鄉小民有能誦書作文辭者袞故宰相有名於時又作
大官臨蒞其民親與之為客主之禮觀遊燕饗必召與
之時未幾皆化翕然詹于時獨秀出袞加敬愛諸生皆
推服閩越之人舉進士繇詹始建中貞元間余就食江
南未接人事往往聞詹名閭巷間詹之稱於江南也久
矣貞元三年余始至京師舉進士聞詹名尤甚八年春

遂與詹文辭同考試登第始相識自後詹歸閩中余或
在京師他處不見詹久者惟詹歸閩中時為然其他時
與詹離率不歷歲移時則必合合必兩忘其所趨久然
後去故余與詹相知為深詹事父母盡孝道仁於妻子
於朋友義以誠氣醇以方容貌嶷嶷然其燕私善謔以
和其文章切深喜往復善自道讀其書知其於慈孝最
隆也十五年冬余以徐州從事朝正于京師詹為國子
監四門助教將率其徒伏闕下舉余為博士會詹有獄

不果上觀其心有益於余將忘其身之賤而為之也嗚呼詹今其死矣詹閩越人也父母老矣捨朝夕之歡以來京師其心將以有得而歸為父母榮也雖其父母之心亦皆然詹在側雖無離憂其志不樂也詹在京師雖有離憂其志樂也若詹者所謂以志養志者歟詹雖未得位其聲名流於人其德行信於朋友雖詹與其父母皆可無憾也詹之事業文章李翱既為之傳余故作哀辭以舒余哀以傳于後以遺其父而解其悲哀以卒詹

志云

求仕與友兮遠違其鄉父母之命兮子奉以行友則既
獲兮祿實不豐以志為養兮何有牛羊事實既修兮名
譽又光父母忻忻兮常若在旁命雖云短兮其存者長
終要必死兮顧不永傷朋友視疾兮藥物甚良飲食孔
時兮所欲無妨壽命不齊兮人道之常在側與遠兮非
有不同山川阻深兮魂魄流行祭祀則及兮勿謂不通
哭泣無益兮抑哀自彊推生知死兮以慰孝誠嗚呼哀

哉兮是亦難忘

德先生誄

李華

或問德先生者奚氏余曰南陽張氏有略其名維之其字也或曰與古誰倫可以造七十子乎余曰七十子或賢或常人方於賢原憲宓子齊其比也或曰大哉余曰七十子親聖人之道者也維之追聖人之道者也七十子得聖人疆畛之際維之得聖人衣冠之潤向使獲親聖人則鱗差新雍也或曰何咎而瞽余曰聖賢偕時故

春秋之亂冉耕惡疾左丘明卜商皆瞽聖如夫子失司
寇饑於陳蔡忠如萇弘謀尊王室而戮死君子道消故
仁賢窮維之隣道昌黎韓拯亦以德聞與維之同病不
幸二子不以病為殮而喪中明者也或曰夫如是得無
誅之余誅之曰神胡病後之人而奪先生噫嘻哀夫德
甫余將疇兄

悼東坡文

李方叔


伏以端明尚書德尊一代名滿五朝道大不容才高為

累惟行能之蓋世致媚忌之為仇久蹭蹬於禁林不遇
故去遂飄零於瘴海卒老于行方幸賜環忽聞亡鑑識
與不識罔不更傷聞所未聞吾將安做皇天后土知一
生忠義之心名山大川還千古英靈之氣係斯文之興
廢與吾道之盛衰茲乃公議之共憂非獨門人之私語
所恨一違師席九易歲華豈圖生還遂有死別慕子貢
築場之意實罄哀誠誦普賢行願之文庶資冥福

詩話

淚如河傾

人問顧長康哭宣武之狀如何曰鼻如廣莫風眼如懸
河決聲如震雷破山淚如傾河注海杜甫用此云猶有
淚成河經天復東注



古今事文類聚前集卷五十四

欽定四庫全書

子部

古今事文類聚前集卷五十五至七

詳校官中書

臣康綸鈞

侍讀臣孫球覆勘

總校官編修

臣王燕緒

校對官中書

臣高中

謄錄監生

臣黃臣鵠

欽定四庫全書

古今事文類聚前集卷五十五

喪事部

祭奠

羣書要語朝奠日出夕奠逮日

禮記

有薦新如朔奠

同上

苟

有明信澗溪沼沚之毛蘋蘩藇藻之菜可羞於王公可

薦於鬼神

左

蕙肴蒸兮蘭藉奠桂酒兮椒漿

九歌

此奠

章以侑一卮

蘇文

濁醪一樽寄酹千里

汪龍溪

龍

古今事實

夢奠兩楹

見死門

炙雞絮酒

徐穉爲太尉黃瓊所辟不就及瓊卒歸葬自負糧徒步到江夏哭之設雞酒薄祭哭畢而去不告姓名又云諸公所辟雖不就有死喪負笈赴事嘗於家豫炙雞一隻以一兩綿絮漬酒暴乾以裹雞徑到所葬家隧外以水

漬綿使有酒氣斗米飯白茅爲藉以雞置前酹酒畢則去不見喪主

斗酒沃酹

曹操感太尉橋玄知已及後經過玄墓自爲祭文曰承從容誓約之言徂歿之後路有經由不以斗酒隻雞相沃酹車過三步腹痛勿忍雖臨時戲笑之言非至親之篤好胡肯爲此哉

生芻一束

見弔慰門

冢前奠酒

白傅葬龍門山河南尹盧貞刻醉吟先生傳立於墓側
今洛陽士庶及四方遊人過其墓者必奠以卮酒冢前
方丈之土常成泥濘

賈黃中
談錄

食瓜遣奠

萊國公杜如晦薨太宗詔虞世南爲制碑文後因食瓜
美愴然悼之遂輟食遣夜奠於靈座

古今文集

雜著

祭亡友柳子厚文

韓愈

嗟嗟子厚而至然耶自古莫不然我又何嗟人之生世
如夢一覺其間利害竟亦何校當其夢時有樂有悲及
其既覺豈足追維凡物之生不願為材犧樽青黃乃木
之灾子之中棄天脫帛羈玉佩瓊琚大放厥詞富貴無
能磨滅誰紀子之自著表表愈偉不善為斲血指汗顏
巧匠旁觀縮手袖間子之文章而不用世乃今吾徒掌

帝之制子之視人自以無前一斤不復羣飛刺天嗟嗟
子厚今也則亡臨絕之音一何琅琅徧告諸友而寄厥
子不鄙謂余亦託以死凡今之交觀勢厚薄余豈可保
能終子託非我知子子實命我猶有鬼神寧敢遺墮念
子永歸無復來期設祭棺前矢心以辭嗚呼哀哉

哲宗皇帝祭司馬溫公文 蘇子瞻

元豐之末天步維艱社稷之衛中外所屬惟是一老屏
予一人名高當世行滿天下措國於泰山之安下令於

流水之源歲月未周紀綱畧定天若相之又復奪之殄
瘁之哀古今所共知之者神考用之者聖母馴致其道
太平可期長為宗臣以表後世往奠其葬庶知予懷

祭歐陽文忠文

蘇子瞻

嗚呼哀哉公之於世六十有六年民有父母國有著龜
斯文有傳學者有師君子有所恃而不恐小人有所畏
而不為譬如大川喬嶽雖不可見其運動而功利之及
於物者蓋不可以數計而周知今公之歿也赤子無所

仰庇而朝廷無所稽疑斯文化於異端學者至於用夷
君子無與爲善而小人沛然自以爲得時譬如深山大
澤龍亡而虎逝則變恠百出舞魍魎而號狐狸昔公之
未用也天下以爲病而其既用也則又以爲遲及其釋
位而去也莫不冀其復用至於請老而歸也莫不悵然
失望而猶庶幾於萬一者幸公之未衰孰謂公無復有
意於斯人也奄一去而莫予追惟厭世之溷濁潔身而
逝乎將民之無祿而天莫肯違昔我先君懷寶避世非

公則莫能致而不肖無狀蚩緣出入受教門下者十有六年於斯聞公之喪義當匍匐而往弔而懷祿不去愧古人以忸怩緘辭千里以寓一哀而已蓋上以為天下慟而下以哭吾私

祭尹師魯文

歐陽永叔

嗟夫師魯辯足以窮萬物而不能當一獄吏志可以狹四海而無所措其一身窮山之崖野水之濱猿獮之窟麋鹿之羣猶不容於其間兮遂即萬鬼而為鄰嗟乎師

魯世之惡子之多未必若愛子者之衆何其窮而至此
兮得非命在乎天而不在于人方其奔顛斥逐困阨艱
屯舉世皆冤而語言未嘗以自及以窮至死而妻子不
見其悲忻用舍進退屈伸語默夫何能然乃學之力至
其握手為訣隱几待終顏色不變笑言從容死生之間
既已能通於性命憂患之至宜其不累於心曾自子云
逝善人宜哀子能自達予又何悲惟其師友之益平生
之舊情之難忘言不可究嗟夫師魯自古有死皆歸無

物惟聖與賢雖埋不沒尤於文章焯若星日子之所為
後世師法雖嗣子尚幼未足以付予而世人藏之庶可
無憂墜失子於衆人最愛予文寓辭千里侑此一樽冀
以慰子聞乎不聞

祭蘇子美文

歐陽永叔

哀哀子美命止斯耶小人之幸君子之嗟子美之心曾
蟠龍蛇風雲變化雨雹交加忽然揮斧霹靂轟車人有
遭之心驚膽落震仆如麻須臾霽止而回顧百里山川

草木開發萌芽子於文章雄豪放肆有如此者吁可恠
耶嗟乎世人知此而已貪悅其外不窺其內欲知子心
窮達之際金石雖堅尚可破碎子於窮達始終仁義唯
久不知乃窮至此蘊而不見遂以沒地獨留文章照耀
後世嗟世之愚掩抑毀傷譬如磨鑑不滅愈光一世之
短萬世之長其間得失不待較量哀哀子美來舉子觴

祭劉恭父樞密文

朱元晦

嗚呼哀哉天胡付公以瓌竒俊偉之材而不并假以耆

耄期耄之壽胡位公以樞機藩屏之重而不遂畀以彌
綸輔贊之權使公名若極富貴而無欲實則抱憂嘆以
終天此中外志義之士所以聞公之薨皆失聲而相弔
或雖未識公面而亦不自知其涕泗之流連者也嗚呼
哀哉惟公生有異質早擢巍科退而自葆弗競弗譁屈
首受書典學於家內充其美外振厥華暨登王朝遂掌
綸綍獻納綢繆訐謨密勿忤權觸要無所回屈帝眷弗
渝試以郡紱受鉞於南勦頑蹈凶婉孌赤子撫摩哀恫

禮賢勸學導和致豐報政三年鄒魯其風帝曰來歸本
我兵柄曾不幾時咨以大政公奮其庸帝虛以聽張磔
宏綱塞絕僭令道直身危突不暇黔出臨兩鎮威熒恩
漸適嬉於堂遽哭於苦恩詔起之有竦其詹公卧弗承
帝悉其孝曰究汝哀來覲來教公言益切公守不撓再
撫於潭亦顯其効乃遷建業民病以饑公不寢食起坐
嗟咨方畧既張惠術四施曾是流萃化為充肥帝嘉乃
勲加勞進律倚毗方深遽告以疾忠無隱情諫有遺筆

帝驚罷朝悼此良弼嗚呼哀哉我以孤童來託公家公
不我鄙勸導有加公姿鸞鵠我性麤麤豈無異同卒莫
疵瑕自公進為論議慷慨實始期公高明光大公之知
我亦晚而最迨其永歸手札告戒褒德撫孤古昔所艱
并以諉我我其敢安把書長號涕隕闕干還坐以思慨
其永歎念昔帝師為國守義亞傳承之夷險一致屏山
雖隱亦豈忘世公襲其傳克廣無替衆咸謂公當訖外
庸入贊皇極下釐庶工登賢屏姦復境攘戎內繼祖考

畢其餘忠天胡難謀而止於此羣邪交慶衆正心死矧予之懷竊究終始願言思公曷其有已嗚呼哀哉昔誦離騷舉公觴兮今拜以哭酌公堂兮私情公義兩怛傷兮神靈不昧尚克鑒予之衷腸兮嗚呼哀哉

又祭劉恭父樞密文

朱元晦

謹遣男埜畧具酒肴之奠敬奉某所撰次先正少傅公神道碑銘草藁告於近故留守觀文樞密彭城劉公靈几之前曰在昔歲次公病欲絕自力為書來告永訣上

言國家讎恥未雪冢骨易枯此恨難滅次念遺阡豐碑
未揭謂我銘之以永前烈下及諸孤羈貫在列謂我教
之它靡顧謁字畫方嚴詞氣凜冽是豈死人而有斯說
三復悲號心膂貫徹聞公是日三簡并折拜疏千言忠
憤是洩我雖不武實擊其節生既人英死當鬼傑又惟
公家忠孝闕閱紀德銘功盍付時哲公命不亂曷取凡
劣諒以孤生幼罹禍孽蒙被前恩欲報罔竭故畧其愚
以累斯碣方將涉筆叙次鋪列屬其來西曠日引月迄

今乃成事偉詞拙遠薦陳之如聽予決想象兩公感涕
摧咽顧念滯留塵土羈紲莫相嗣人講貫劇切以此負
公一飯再噎頃為迎師寄此筆舌比聞授受稍契磁鐵
尚其不厭習久而悅盡掃童心罔蹈非轍彼齊彼孺悉
藉提挈卒大公門緩此憂悵山瓢往酌野蔞并設老淚
如傾遠寄清血嗚呼哀哉

祭張敬夫殿撰文

朱元晦

嗚呼敬夫遽棄予而死也耶我昔求道未獲其友蔽莫

予聞客莫予剖蓋自從公而觀於大業之規模察彼羣
言之紛糾於是相與切磋以究之而又相厲以死守也
丙戌之冬風雪南山解袂儲州今十五年公試畿輔公
翔禁省公牧予南我遯巖嶺顯晦殊途心莫與同書疏
惻惻鬼神可通公尹江陵我官廬嶽驛騎相望音問愈
數去臘之窮有來自西告我公疾手書在携我觀於時
神理或僭是疾雖微已是深念亟遣問訊閱月而歸叩
函發書歎吒歔歔時友曾子實同我憂揮涕請行誼不

忍留曾行未幾公計果至張侯適來相向反袂嗚呼敬夫竟棄予而死也耶惟公家傳忠孝學造精微外為軍民之所屬望內為學者之所依歸治民以寬事君以敬正大光明表裏輝映自我觀之非惟十駕之弗及蓋未必終日言而可盡也矧聞公喪痛徹心膂緘詞寄哀不遑他語顧聞公之臨絕手遺疏以納忠召賓佐而與訣委符節而告終蓋所謂得正而斃者又凜乎其有史魚之風此猶足以為吾道而增氣抑又可以上悟於宸聰

又聞公於此時屬其弟以語予用斯文以為寄意懇懇而無餘顧何德以堪之然敢不竭其庸虛并矢詞以為報尚精爽其鑒茲

又祭張敬夫殿撰文

朱元晦

其位朱某竊聞故友敬夫張兄右文殿修撰大葬有期謹遣清酌時羞奠於柩前南望拜哭起而言曰嗚呼自孔孟之云遠聖學絕而莫繼得周張與程子道乃抗而不墜然微言之輟響今未及乎百歲士各私其所聞已

不勝其乖異嗟惟我之與兄昭志同而心契或面講而
未窮又書傳而不置蓋有我之所是而兄以為非亦有
兄之所然而我之所議又有始所共嚮而終悟其偏亦
有早所同擠而晚得其味蓋繳紛徃反者幾十餘年末
乃同歸而一致由是上而天道之微遠而聖言之祕近
則進修之方大則行藏之義以兄之明固已洞照而無
遺若我之愚亦幸竊窺其一二然兄喬木之故家而我
衡茅之賤士兄高明而宏博我狷狹而迂滯故我嘗謂

兄宜以是而行之當時兄亦謂我盍以是而傳之來裔
蓋雖隱顯之或殊實則交濡而共濟不惟相知之甚審
抑亦自靖而無愧嗚呼孰謂乃使兄終在外以違其心
予亦見縻於斯而所願將不遂也政使得聞以就其書
是亦任左肱而失右臂也傷哉吾道之窮予復何心於
此世也惟修身補過以畢餘年庶有以見兄於下地也
聞兄之葬而不得臨獨南望長號以寄此酹也惟兄憐
而鑒之尚有以輔予之志也嗚呼哀哉

祭呂伯恭著作文

朱元晦

嗚呼哀哉天降割於斯文何其酷耶往歲已奪吾敬夫
今者伯恭胡為又至於不淑耶道學將誰使之振君德
將誰使之復後生將誰使之誨斯民將誰使之福經說
將誰使之繼事記將誰使之續耶若我之愚則病將誰
為之箴過將誰為之督耶然則伯恭之亡曷為而不使
我失聲而驚呼號天而慟哭耶嗚呼伯恭有著龜之智
而處之若愚有江漢之辯而守之若訥有雲夢之富

而不以自多詞有黼黻之華而不易其出此固今人之
所難而未足以議兄之彷彿也若乃孝友絕人而勉勵
如弗及恬淡寡慾而持守不少懈盡言以納忠而羞為
訐秉義以飭躬而恥為介是則古之君子尚或難之而
吾伯恭猶歆然而未肯以自大也蓋其德宇寬洪識量
閎廓既海納而淵澄豈澄清而撓濁矧涵濡於先訓紹
文獻於厥家又隆師而親友極討論之幽遐所以稟之
既厚而養之深取之既博而成之粹宜所立之甚高亦

無求而不備故其講道於家則時雨之化進位於朝則
鴻羽之儀造辟陳謨則宣公獨御之對承詔奏篇則右
尹祈招之詩上方虛心而聽納衆亦注目其專施何遭
時之不遂遽縈疾而言歸慨一卧以三年尚左圖而右
書間逍遙以曳杖恍沂上之風雩衆咸喜其有瘳與卒
攄其素蘊不則傳道以著書抑亦後來之程準何此望
之難必奄一夕而長終增有邦之殄瘁極吾黨之哀恫
嗚呼哀哉我實無似兄辱與遊講摩深切情義綢繆粵

前日之枉書尚燦然其手筆始言沉痾之難除猶幸死期之未即中語簡編之次第卒誇草樹之深幽謂昔騰牋而有約盡令命駕以來遊欣此日之可懷慄計車而偕至考日月之幾何不旦暮之三四嗚呼伯恭而遽死耶吾道之衰乃至此耶既為位以泄哀復緘辭以寓奠冀嗣歲之有間尚前言之可踐嗚呼哀哉

祭鄭自明文

朱元晦

故友台州刺君大著鄭兄自明之靈曰比年以來士氣

衰弱觀時俯仰徇勢前却其心有一身而無天下其口
有唯唯而無諤諤偉哉自明之為人信所謂喧啾百鳥
之羣忽見秋天之一鶚者也蓋自其布衣而已有憂天
下之心其揖讓人主之前則直欲排佞倖之朋從而折
其角其言明白切至磊磊落落憤激峻厲嶢嶢嶽嶽明
主所為虛心而嘉嘆羣公所為變俗而駭愕善類所為
喜幸而心開邪黨所為戚嗟而氣索偉哉自明之為人
凜乎其有古諍臣之風求之近世則措之鄒陳之間而

無忤者也夫何天命之不延奇禍一朝而遽作使前之
悲者喜而喜者悲紛慶弔之交錯嗚呼哀哉君昔過我
寒泉之濱一語定交情義日親逮上饒之草次語宵分
而更僕謂當擇善以潛心毋以一長而自足粵今茲之
秋孟又札書以申之眷予心之惻歎實千秋以為期書
適往而訃來噉焉號其焉及哦殄瘁之悲詩全百憂之
來集惟平生之忠赤諒雖死而不忘跪陳情於一酹詞
與淚以俱揚嗚呼哀哉

祭徐子宜侍郎文

葉正則

嗚呼甲寅之歲天地震崩惟左司郎晝惶夜驚創心為
謀殞身為行奉漏沃焦幸而復寧曾未幾時有命南竄
虛罪山出浮毀波亂騰書文章預指牢犴請誅請族以
一咻萬自茲十年旅食僦宿以醫自混以藥自鬻穉兒
道長老母門哭逢舊御史攘臂瞋目歲復在寅江淮大
寇投之湓城俾塞賊衝毀樓學舫燒土補墉募兵滿階
鼓劍交胷秣陵之畫衆固不右遂徙豫章聞聽日謬沸

羹再興羅織重就朝傳罷斥暮報彈奏嗚呼哀哉課其
前功廟祔之思陳其徃寃行路之悲彼讒不圖別立是
非室人孔安噫我獨危嗚呼哀哉心恭貌冲氣順詞正
如璋如珪起愛起敬誰託之孤誰寄之命今也云亡可
以論定嗚呼哀哉惟鑒者神惟知者天物險我平雖艱
不偏匪伊後來古聖則然盡此一觴歸安於泉

祭薛子舒文

葉正則

嗚呼元化顯行衆哲繁興失其所弘寥寥罕承孰挈乎

道而昧以書孰安乎故迷性之初我雖空虛庶見子充
千年羣疑百世孤通子生甚遲子知何速靡煩播種自
致荏菽未聞先悟未睹先領虞夏昭回漢唐蘇醒危豈
意持顛豈貌扶極古窮今以鎰稱銖如車既成共載一
轂誰將西歸懸折子軸寧從絳老辱於城與忍同賈生
賦彼坐隅山林臯壤我久退聽子胡必然有視無瞑寒
泉沉沉露菊采采餅罍覆翻天地常在

祭勉齋黃寺丞文

趙履常

嗚呼文儒之士莫今為昌耳剝臆忖師模其荒貌澤言
慧被服先王非不可觀如潦方張及一旦利害毛髮則
相顧氣奪遁走披猖蓋自朱氏之歿時事一變而斯道
幾於淪亡公之得其傳於朱氏者甚親也規圓矩方擇
精而語詳不惟經訓理說可以緝遺緒嗣絕響表獨立
於鄭公之鄉而其行義堅正難進易退之節又足以方
軌前哲抗浮雲而磨蒼蒼僕昔與公定交於朱氏之堂
今茲來南日接從容固竊羨其年艾而氣剛何恙亟逝

聞之彷徨布衣十年綰郡章而儀朝行不為不達矣而
筭無兼衣瓶無宿糧入啗其家敗帟瓦燈四壁淒涼親
黨聚食其累累學徒相弔而偃偃講道無師不特為一
閩惜而東南人物求如公比者蓋如晨星之相望路人
聞之且相語而掩泣則契好素厚者當如何其悲傷悠
悠我思惻其難忘君靈若存歆此薦觴

贈贈

助葬
附

羣書要語贈助也贈者赴也所以助生送死追遠思終

副至意也貨財曰賻車馬曰賵玩好曰贈衣被曰襚贈

之為言稱也襚之為言遺也

白虎通

賵莫於生死兩施

儀禮

弔喪弗能賻不問其所費

曲禮

贈死不及尸非禮也注尸

未葬之通稱

隱元

乘馬曰賵衣衾曰襚貝玉曰含錢財曰

賻

穀梁傳

魯人之贈也三女三鰻

儀禮

吾惡乎涕泗而無以

將之

家語

賻賵所以佐生贈襚所以送死

荀大畧

古今事實

賻布班貧

子柳之母死子碩請具子柳曰何以哉子碩曰請粥庶弟之母子柳曰如之何其弔人之母以葬其母也不可既葬子碩欲以賻布之餘具祭器子柳曰不可吾聞之也君子不家於喪請班諸兄弟之貧者

說驂而賻

孔子之衛遇舊館人之喪入而哭之哀出使子貢說驂而賻之子貢曰於門人之喪未有所說驂說驂於舊館無乃已重乎夫子曰予鄉者入而哭之遇於一哀而出

涕予惡夫涕之無從也小子行之

攝束帛

伯高之喪孔子之使者未至冉子攝束帛乘馬而將之
孔子曰異哉徒使我不誠於伯高

不釋服而禭

衛有太史曰柳莊寢疾公曰若疾革雖當祭必告公再
拜稽首請於尸曰有臣柳莊也者非寡人之臣社稷之
臣也聞之死請往不釋服而往遂以禭之鄭注不脫君

祭服以祿臣親賢也

檀弓

以璫璵斂

季平子卒將以君之璫璵斂贈以珠玉孔子聞之曰送

死以寶玉是猶暴死於中原示人以姦利之端

家語

還其賦斂

漢原涉祖父為南陽太守死官賦斂送葬皆千萬以上

涉讓還之

本傳

懷緘一匹

後王丹傳時河南太守同郡陳遵關西之大俠也其友人喪親遵為護喪事賻助甚豐丹乃懷縑一匹陳之於主人前曰如丹此縑出自機杼遵聞而有慙色

辭其賻贈

王渾為涼州刺史卒故吏賻贈數百萬其子戎辭而不

受由是顯名

本傳

悉辭贈賻

管寧字幼安喪父中表愍其孤貧咸共贈賻悉辭不受

稱財以送終

本傳

送以家貲

以下條助葬

唐郭震字元振年十六與薛稷趙彥昭同為太學生家嘗送緡錢四十萬會有縗服者叩門自言五世未葬願假以治喪元振舉與之無少吝一不質名氏稷等嘆駭贈以麥舟

本朝范文正公仲淹在睢陽遣堯夫到姑蘇般麥五百斛堯夫時尚少既還舟次丹陽見石曼卿問寄此何久

荅曰兩月矣三喪在淺土欲葬之而北歸無可與謀者
堯夫以所載麥舟付之到家侍立良久文正曰東吳見
故舊乎曰曼卿為三喪未舉方滯丹陽時無郭元振無
可告者文正曰何不以麥舟與之堯夫曰已付之矣

冷齋

夜話

罄資助葬

河東柳先生仲塗少時縱飲酒肆坐側有書生接語乃
以貧未能葬其父母將謁魏守王公祐求資以辦事先

生問費幾何曰得錢二十萬可矣先生曰子姑就舍吾
且為子謀之罄其資得白金百兩錢數萬以遺之議者
以郭代公之義不能遠過

澠水燕談

古今文集

古詩

李憲仲哀詞并叙

蘇子瞻

同年友李君諱惇字憲仲賢而有文不幸早世軾不及
與之遊也而識其子廌有年矣廌自陽翟見余於南京

泣曰吾祖母邊母馬前母張與君之喪皆未葬貧不敢
以飢寒為戚顧四喪未舉死不瞑目矣適故人梁先吉
老聞余將歸耕陽羨以絹十匹絲百兩為贐辭之不可
乃以遺鴈曰此亦仁人之餽也既又作詩以告知君與
鴈者庶幾皆有以助之鴈年二十五其文雖然氣節不
凡此豈終窮也哉

大夢行當覺吾年特未滿遑哀已逝人長眠寄孤館念
我同年生意長日月短鹽車困騏驥烈火廢圭瓚後生

有奇骨出語已精悍蕭然野鶴姿誰復識中散有生寓
大塊死者誰不歎嗟君獨久客不識黃土暖推衣助孝
子一漑滋湯旱誰能脫左驂大事不可緩

贈章默

蘇子瞻

章默居士字季明生公侯家才性高爽棄家求道不蓄
妻子與世無累而父母與兄之喪貧不能舉以是眷眷
世間不能無求於人余深哀其志既有以少助之又助
其言為詩以贈其行庶幾有哀之者

章子親未葬餘生抱羸疾朝吟噎鄰里夜淚腐茵席前
年黑花生今歲白髮出身隨日月逝恨與天地畢願求
不毛田親築長夜室難從王孫裸未忍夏后塋五陵多
豪士百萬付一擲心知義財難甘就貧友乞不辭毛髮
施行自丘山積此志苟朝遂夕死真不減誓求無生理
不踐有為迹棄身屍陀林烏鴛任狼籍

古今事文類聚前集卷五十五

欽定四庫全書

古今事文類聚前集卷五十六

宋 祝穆 撰

喪事部

壽藏

羣書要語壽藏謂冢墳也稱壽者取其久遠之意

漢書注

古今事實

樂哉斯丘

公叔文子升於瑕丘蘧伯玉從文子曰樂哉斯丘也死則我欲葬焉蘧伯玉曰吾子樂之則瑗請前注刺其欲

害人良田

擅弓下

宰如

子貢倦於學告於仲尼曰願有所息仲尼曰生無所息望其壙畢如也宰如也墳如也鬲如也則知所息矣

子荀

將歸故宅

陶子將辭逆旅之館永歸於故宅羞以嘉蔬薦以清酌

淵明自
祭文

樹檟爲櫬

季孫爲已樹六檟於蒲圃東門之外欲自爲櫬也

左傳

奏請塋地

張禹年老自治冢塋起祠堂好平陵肥牛亭部處地又
近延陵奏請求之上以賜禹

自爲壽藏

後漢趙岐獻帝時爲太僕副太僕馬日磾撫慰天下岐

老病留荊州就拜太常建安六年卒先自為壽藏圖季
札子產晏嬰叔向四像居賓位又自畫其像居主位皆
為讚頌勅其子曰我死之日墓中聚沙為牀布簾白衣
散髮其上覆以單被即日便下下訖便掩坎

本傳

預定其地

安定真善筭術成帝時真常自筭其年七十三至期果
死又曰北邙青壠上孤櫬之西四丈所鑿之七尺吾葬
地也真死依言往掘得古時空槨即以葬焉

西京雜記

喟然營墓

曹植登魚山臨東阿喟然有終焉之心遂營為墓遺令
薄葬

自署其穴

姚崇孫勗自為壽藏於萬安山麓祖塋之傍署兆曰寂
居穴墳曰復真堂中剝土為臺曰化臺

新唐史

酌酒賦詩

唐司空圖豫為冢棺遇勝日引客坐壙中賦詩酌酒客

或難之圖曰君何不廣耶生死一致吾寧暫游此中哉

詔賜墳塋

唐高宗詔賜英國勣墳塋一所時勣猶在

祔葬祖墓

傅永字修期嘗登北邙山於平垵處奮矛躍馬回旋瞻望欲祔葬於祖墓遂買左右地數畝遺勅子叔偉此吾之永宅也

刻石其上

本朝王樵淄川人自號贅世翁預卜為宛名菴室中置石榻刻石其上曰生前投軀以虞不備沒後寄魄以備

不虞

澠水燕談

古今文集

律詩

得壽藏於先壠之旁俯酬素願感慨交懷

范至能

密邇松楸地一隅會心何必問青烏亢宗雖愧鎮公子

沒世尚從先大夫京兆漢阡賢問望邢山鄭冢舊規模
家庭遺訓君蒿在不學邠鄉畫古圖

重九日行營壽藏之地 范至能

家山隨處可松楸荷鍾携壺似醉劉縱有千年鐵門限
終須一箇土饅頭三輪世界猶灰劫四大形骸強首丘
螻蟻烏鳶何厚薄晚風拊掌菊花秋

葬

羣書要語葬不如禮曰埋埋瘞也趣使腐朽而已不得

埋曰棄不得其尸曰捐葬下棺曰窆

釋名

祖載者始載於

庭乘軸車辭祖禰故曰祖載

白虎通

國子高曰葬者藏也

藏者欲人之弗得見也是故衣足以飾身棺周於衣槨

周於棺土周於槨

檀弓

塗車芻靈自古有之注芻靈束茅

為人焉謂之靈者神之類孔子謂為芻靈者善謂為俑

者不仁不殆於用人乎

檀弓

飾棺牆置翣注牆柳衣又云

絞衾設柳翣注絞衾尸之飾柳翣棺之牆飾翣以木為

筐方兩角衣以白布畫者畫雲氣

同

葬於墓所以即遠

也

檀弓

有虞氏瓦棺夏后氏堅周堅燒土葬也

上同

銘明旌

也以死者為不可別也故以其旗識之

上同

君葬用輶四

綍二碑御棺用羽葆大夫葬用輶二綍二碑御棺用茅

士葬用車二綍無碑

上同

助葬必執紼

曲禮

從前曰紼紼發

也發車使行也

釋名

其輶有袞緇布裳帷素錦以為屋而

行注輶載柩之車飾也

雜記

古人葬者不封不樹後世聖

人易之以棺槨

繫辭

改葬總注謂墳墓以他故崩壞將亡

失尸柩也必服總者親見其柩不可以無服總三月而

除之

儀禮喪服

楚子病告大夫曰唯是春秋窀穸之事注窀

厚窆夜厚夜長夜也

左傳

孟子曰養生者不足以當大事

惟送死可以當大事

離婁

歔不如槨塗之曰殯

穀梁傳

歔車

既展祖奠斯聞

張說祭文

號護膺翼

白集

既舉葬紼

柳集

柳車芻

靈飛旒翩翩

權集

檣櫨小棺也

晏類要

藁殯邛阜又藁瘞城

隅謂權葬也

燕碑

先遠戒日

文選

遠日有時

白集

題湊既肅龜

筮既辰注題湊棺木內向也晨輶解鳳曉蓋我金注輶

輶喪車也

沈約齊安陸王碑

古今事實

更葬朽骨

周文王作靈臺掘地得死人之骨王曰更葬之吏曰此無主矣文王曰有天下者天下之主也有一國者一國之主也寡人固其主又安求之主遂更葬之天下皆曰文王賢矣澤及朽骨況於人乎

新序

馬鬣封

孔子之喪有自燕來觀者舍於子夏氏子夏曰聖人之

葬人與人之葬聖人也子何觀焉昔夫子言曰吾觀封之若堂者矣見若防者矣見若覆夏屋者矣見若斧者矣吾從若斧者焉馬鬣封之謂也

不如速朽

宋司馬桓魋為石槨三年不成孔子曰不如速朽

合葬非古

季武子成寢杜氏之葬在西階之下請合葬焉武子曰

合葬非古也自周公以來未之有改也

檀弓

犯人之未

季子臯葬其妻犯人之未申祥以告曰請庚之

庚償也

子

臯曰孟氏不以是罪予朋友不以是棄予以吾為邑長

於斯也買道而葬後難繼也

檀弓

葬不食之地

成子高寢疾曰吾縱生無益於人吾可以死害於人乎

哉死則擇不食之地而葬我焉

檀弓

預知葬後

檮里子且死曰葬我必於渭南章臺東後百年當有天子宮夾我墓及漢興長樂宮在其東未央宮在其西武

庫直其上

劉向說苑

雨不克襄事

二十八年葬定公雨不克襄

成也

事禮也注雨而成事若

汲汲於欲葬宣七年己丑葬我小君敬嬴雨不克葬庚

寅日中而克葬禮也禮卜葬先遠日

弗毀當道室

鄭簡公卒將為葬除及游氏之廟子產使辟之司墓之室有當道者子太叔請毀之子產弗毀

左傳
十二

不歸鄉葬

延陵季子適齊而返其子死葬於贏博之間不歸鄉里

玉魚

長安大明宮宣政殿每夜見數騎衣鮮麗遊其間高宗使巫祝劉明奴王湛然問其所由鬼云我乃漢楚王戊太子死葬於此明奴等曰按漢書戊與七國反誅死無

後焉得有子葬於此鬼曰我當時入朝以路遠不從坐
後病死天子於此葬我漢書自有遺誤耳明奴因許與
之改葬鬼喜曰我昔日亦是近屬今在天子宮內出入
不安改卜極為幸甚今在殿東北入地丈餘我死時天
子斂我玉魚一雙今猶未朽必以此相送勿見奪也明
奴以事奏聞有勅改葬苑外及發掘玉魚宛然見在以
此其事遂絕

西京
雜記

葬近烈士



後漢梁鴻疾且告主人曰昔延陵季子葬子於嬴博之間不歸鄉慎勿令我持喪歸去及卒臯伯通等為求葬地於要離冢傍咸曰要離烈士而伯鸞清高可令相近

銀鏤黃腸

梁商薨賜以東園朱壽之器銀鏤黃腸注器棺也以朱飾之以銀鏤之前漢音義曰以柏木黃心為槨曰黃腸也及葬賜輕車介士注輕車兵車介士甲士也

葬不擇日

見陰陽
避忌門

埋玉樹

晉庾亮位司空薨將葬何充會之嘆曰埋玉樹於土中
使人情何能已

荷鍾自隨

晉劉伶放情肆志常以細萬物齊宇宙為心每乘鹿車
携一壺酒使人荷鍾隨之曰死便埋我

命葬枯骨

後魏宋世良以御史使河北還過汲郡見城傍多骸骨

移文州郡悉令收瘞其夜甘雨滂沱後周賀蘭祥為荊
州刺史境內亢旱見發掘古塚暴露骸骨者命收瘞之
即日澍雨

瘞將士骸

唐劉昌節度涇原初城平涼當吐蕃刼盟後將士骸骨
不藏昌命瘞之夕夢若原謝者昌具以聞德宗下詔哀
痛出衣數百稱官為賽具斂以棺槨分建二塚大將曰
旌義冢士曰懷忠冢於淺水原詔學士為銘

瘞楊貴妃

唐楊貴妃死裹尸以紫茵瘞於道側玄宗至自蜀過其所使祭之密遣中使具棺槨他葬焉啓瘞故香囊猶在中人以獻帝視之流涕

金枕

盧充家西有崔少府墓一日見一府舍門進見少府與崔小女為婚三日崔曰君可歸女生男當以相還居四年三月三日臨水忽見崔氏并少府抱兒還充又與益

并贈詩一首充取兒盜及詩女忽不見充詣市賣盜崔
女姨曰我妹之女嫁而亡贈以金挽着棺云

以勢奪山

潘允朱勔里人不登其門允字悅之吳門人仕裕陵為
侍從時郡民朱勔以倖進寵眷無比父冲殂勔護喪歸
葬鄉間傾城出迓而潘獨不往潘之先塋適有山林形
勢近冲新阡勔欲得之乃修敬於潘潘杜門不納勔恃
恩自恣遣人諷之且席以薰天之勢潘一切拒之勔歸

京師果訴於上降御旨奪之已而又假御史誣之以罪

褫潘之職

揮塵錄

古今文集

雜著

濠州刺史劉公善政述

不許權殯

盧子駿

客有自濠梁來者余訊之曰濠梁之政何如客曰楚俗好巫而信鬼死者其親戚不敢穿斂事葬相傳立小屋號曰殯宮焉雖在城郭而為之有土木墮橐棺櫬巍然

者有棺槨分圻骸骨縱橫者不獨庶人而士大夫之家有焉劉公惻然曰非禮也吾忍不導之耶下令曰某月有限限畢其家不闕地葬者笞二十鰥寡憊獨力不任者絕嗣無主傍無近親者刺史以俸錢為營之訖事人無犯令野無殯宮焉盧子曰異乎哉劉公今日能以禮導邦人且夫葬者藏也欲人之不得見也奈何宿昔濠之人不藏其父子昆弟耶又曰生事之以禮死葬之以禮奈何宿昔濠之人不以禮葬其父子昆弟耶又曰延

陵季子葬其子仲尼觀之曰其坎深不至於泉期斂以時服奈何宿昔濠之人喪其父母昆弟不葬於土中耶又曰魂氣歸於天形魄歸於地奈何宿昔濠之人不歸其父子昆弟之形於地耶今刺史彭城劉公教生者以禮示之日月信也恤死者以仁除其暴露義也合此智以成之難乎哉余耳得客之言不決旬適至濠上因書以備太史氏采錄焉

禁焚死

賈同

傳曰孝子事死如事生又曰父母全而生之子全而歸之不亦孝乎父母既殆斂手足形旋葬慎護戒潔奉屍如生斯謂之事死身體髮膚無有毀傷以沒於地斯之謂歸全古今達禮也夫生而或毀傷之雖不仁猶有為也死而後毀傷之則其不仁不亦甚矣故曰君子慎終此之謂歟噫今之多焚其死者何哉禮曰新宮火有焚其先人之敝廬三日哭夫宮廟之與廬舍猶然况又執火而焚其屍者乎惡不容於誅矣謂縱不仁之子棄其

屍於中野使烏鵲狐狸食之不猶愈於自殘之者歟閭閻既以為俗而漸染於士大夫之家亦多為之或以守職徼遠死祔於先祖之塋域故焚之以苟其便易嗚呼先王制禮士大夫奉以立身推以化民如之何其苟便易而棄之也豈獨棄禮哉抑亦舉其親而棄之也設不幸道遠而貧未能奉而歸買地而葬之廬而守之候其久也負骨而歸不亦可乎又或者以惡疾而死俗云有種慮染其後者而焚之斯則既不仁矣又惑之甚者夫

修短有命疾病生乎身豈有例哉如云世積殃遺子孫則雖焚之無益也根其由蓋始自桑門之教西域之胡俗也夫聖王御世制禮作樂布浹仁義使天下密如四夷嚮化如之何使夷俗之法敗先王之禮經耶教天下以不仁耶請禁

焚尸之慘

自釋氏火化之說起於是死而焚尸者所在皆然固有炎暑之際畏其穢泄斂不終日肉未及寒而就焚者矣

魯夏父弗忌獻逆祀之議展禽曰必有殃雖壽而沒不
為無殃既其葬也焚煙徹於上謂已葬而火焚其棺槨
也吳伐楚其師居麋楚司馬子期將焚之令尹子西曰
父兄親暴骨焉不能收又焚之不可謂前年楚人與吳
戰多死麋中不可并焚也衛人掘褚師定子之墓焚之
於平莊之上燕騎劫園齊即墨掘人冢墓燒死人齊人
望見涕泗怒自十倍王莽作焚如之刑燒陳良等則是
古人以焚尸為大僂也列子曰楚之南有炎人之國其

親戚死

音寡

其肉而棄之然後埋其骨秦之西有儀渠

之國其親戚死聚柴積而焚之燠則煙上謂之登遐然

後成為孝子此上以為政下以為俗而未足以為異也

蓋是時其風未行於中國故列子以儀渠為異至與

肉者同言之

容齋
隨筆

漏澤園之創

漏澤園之法起於元豐間初予外祖以朝官為開封府
界使者嘗行部宿陳留佛祠夜且半聞垣外洶洶若有

人聲起燭之四望積骸蔽野皆貧無以葬者委骨於此
意惻然哀之即具已所見聞請斥官地數頃以葬之即
日報可神宗仍命外祖摠其事凡得遺骸八萬餘每三
千為坎皆溝洫什伍為曹序有表總有圖規其地之一
隅以為佛寺歲令寺僧之徒一人使掌其籍焉外祖陳
氏名向字適中睦州人起白屋以才自見屢使諸路有
能名官制初行為度支員外郎元祐初出為江西轉運
副使徙楚州未幾卒

却掃
編

漳州義塚記

危鎮

人死曰歸葬曰藏歸者復其所也藏者欲人之不得見也故先王制禮喪葬有期下至於士則踰月而已何漳之為子若孫者乃有不葬之俗耶其親死往往舉其柩而置之僧寺是蓋始於苟簡中則因循久則忘之矣嗚呼已則忘之矣而不知虛廊冷殿之間寒聲泣霜弱影弔月其望於子孫一旦之興念者猶未已也蓋嘗命官僚覈其事近城之五里乃有木瓦棺合二千三百有奇

爰擇於城之西南北高燥地立為義塚三每所大為之
域既封覆以青莎使如舊壠前途白堊書其有名氏者
庶幾子孫猶來祭享也訖事郡人合辭以請記余曰義
之名立其始於不義而後見也此其不義果起於誰乎
曰僧人其作俑者也是間層山疊林梵宇無數廊廡間
率不置神若佛類為土室其入如賓黯然無光斯皆誘
愚俗以來殯者也彼棘人者舉其親而即安於彼死者
一入杳無葬期使其子若孫良心陷溺不復知有天理

之正人道之終此有識者之所深恨也原道曰不塞不
流不止不行近因為令下諸浮圖必使盡改其室以為
僧房不改則鞭其人而俗之籍其田而公之蓋治盜之
法治其藏者此法常存則誘者始有所畏死者始有所
歸矣是為記

古今事文類聚前集卷五十六

欽定四庫全書

古今事文類聚前集卷五十七

宋 祝穆 撰

喪事部

薄葬

厚葬 送葬
歸葬並附

羣書要語死欲速朽

禮曲

仲尼孝子延陵慈父其葬骨肉

皆微薄矣非苟為儉誠便於體德彌厚者葬彌薄知愈

深者葬愈微丘壠彌高發掘必速

漢成紀

夫厚葬之家流

於俗以侈靡為孝令死者戮尸暴骸可不痛哉死者無

知自同糞土豈煩奢葬使其有知神不在柩何用破貨

徇侈乎

姚崇傳

孔丘亞聖母墓毀而不備梁鴻至賢父亡

席卷而葬

姚崇文

厚葬生不極養死乃崇喪或至金縷玉匣致藏埋珍寶

偶人馬車造起大冢濶樹松柏

潛夫論

含珠鱗施注含珠

口實鱗施玉匣於死者之體如魚鱗

呂氏春秋

送葬天子七月而葬同軌畢至諸侯五月同盟至大夫

三月同位至士踰月外姻至

左傳

歸葬以俟通歲歸祔於櫨

呂溫集

扶護旅櫨以歸

韓文

詩句塏埴為塗車束薪作芻靈

陸機

紉嬰交橫逐去魂

杜牧

之悲風吹雨濕銘旌

方雄飛

風引簫笳入

白居易

容車催曉發

張曲江集

古今事實

烏鳶螻蟻

莊子將死弟子欲厚葬之莊子曰吾以天地為棺槨以

日月為連壁星辰為珠璣萬物為賁送吾葬具豈不備耶何以加此弟子曰吾恐烏鳶之食夫子也莊子曰在上為烏鳶食在下為螻蟻食奪彼與此何其偏也以不平平其平也

王孫羸葬

楊王孫者孝武時人家業累千金厚自奉養生亡所不致及病且終先令其子曰吾欲羸葬以反吾真必亡易吾志則為布囊盛尸入地七尺既下從足引脫其囊以

身親土其子不忍迺往見王孫友人祁侯示以王孫遺令祁侯曰善

不待石槨

漢張釋之為中郎將從文帝至霸陵上居外厠指示慎夫人新豐道曰此走邯鄲道也使夫人鼓瑟上倚瑟而歌意悽愴悲嘆曰嗟乎以北山石為槨用紵絮斷陳漆其間豈可動哉釋之曰使其中有可欲雖亡石槨又何戚焉帝稱善

素棺速朽

東漢趙咨將終告其故吏朱祗蕭建等曰薄斂素棺籍以黃壤欲令速朽且歸后土不聽子孫改之

本傳

遺命薄葬

後漢皇甫規遺命曰地底冥冥長無曉期而復纏以纊綿牢以釘漆為不喜耳幸有前寃朝殞夕下措尸靈牀幅巾而已奢非晉文

晉文公請隧王不許以臣而請王禮奢也

儉非王孫推

情從意庶無咎咨諸子從之

堯典狗葬

後漢周盤堅伯云命終之日桐棺足以周身外槨足以周棺斂形懸封濯衣幅巾寫堯典一篇置棺前示不忘聖道學者以為知命焉

鄭大夫冢

杜預遺令言邢山上有冢云是鄭大夫祭仲或云子產墓隧道惟塞其後而空其前不填之示藏無珍寶不取於重深也山多美石不用必取水中自然之石以為冢

示不勞工巧而此石不入世用也君子尚有情小人無利可動吾自表營洛陽城東首陽之南將來域兆儀制取法鄭大夫欲以儉自完耳

勿甃勿墳

晉書王祥為睢陵公疾篤遺令曰西印上土自堅貞勿甃石勿起墳壠

以書殉葬

梁元帝金樓子曰吾之亡也可以一卷孝經一帙老子

陶華陽劍一口以自隨外此珠玉不入銅錫不藏也田
國讓求葬於西門豹側杜元凱求葬於路仲冢邊曹子
臧求葬於蘧伯玉側梁伯鸞求葬於要離之傍彼四子
者異乎吾之意也金蠶無吐絲之實瓦雞無司晨之用
謹毋以血膾臂脰為祭也棺槨之造起自軒轅周室有
膚翼之飾晉文公請隧桓司馬石槨甚亡謂也

悲辭儀物

唐書魏徵陪葬昭陵妻裴氏曰徵平生儉素今以一品

禮葬羽儀甚盛非亡者之志悉辭不受竟以布車載柩
無文采之飾

勿封土立碑

唐司勳致仕李建勳且死戒家人曰時事如此吾得良
死幸矣勿封土立碑聽人耕種於其上免為他日開發
之標及江南亡諸貴人高大之冢無不發者惟建勳莫
知其處

斂以常服

姚崇遺令吾亡斂以常服四時衣各一

美棺葬親

以下條
厚葬

孟子自齊葬於魯反於齊止於嬴充虞請曰前日不知
虞之不肖使虞敦匠事嚴虞不敢請今願竊有請也木
若以美然曰古者棺槨無度中古棺七寸槨稱之非直
為觀美也然後盡於人心不得不以為悅無財不可
以為悅得之為有財古之人皆用之吾何為獨不然且
比化者無使土親膚於人心獨無忤乎吾聞之也君子

不以天下儉其親

公孫
丑

蜃炭蛤灰

宋文公始厚葬用蜃炭燒蛤為灰以瘞壙

大治冢舍

漢原涉字巨先父為南陽太守死讓還南陽賻贈千萬
以上涉後自以身得其名而今先人墳墓儉約非孝也
迺大治冢舍周閣重樓初武帝時京兆尹曹氏葬茂陵
人謂其道為京兆阡涉慕之買地開道立表曰南陽阡

人不肯從謂之原氏阡

古冢珍寶

齊書曰始興王鎰鎮蜀於州園地得古冢珍寶甚多金銀為蠶形者數斗又以朱沙為阜水銀為池

為盜所發

張侍中者遺言厚葬晏丞相殊遺言薄葬二公俱葬陽翟元祐中同為盜所發侍中壙中金玉犀珠充塞盜不近其棺所得已不勝慰皆列拜而去丞相壙中瓦器數

十盜怒不酬其勞斲棺取金帶亦木也遂以斧碎其骨

厚葬免禍薄葬致禍楊王孫之計疎矣

聞見錄

送車千乘

以下係送葬

劇孟葬母使自遠方送葬蓋千乘

四方來會

陳蕃竇武為閹人所害林宗哭之於野慨然而嘆曰人之云亡邦國殄瘁瞻烏爰止不知于誰之屋耳明年卒四方之士千餘人皆來會葬

因夢會葬

范式字巨卿張邵字元伯相與為友元伯寢疾而卒式
忽夢元伯呼曰巨卿吾以某日死以某日葬子未我忘
豈能相及式便服朋友之服馳往赴之式未及到而喪
已發引既至壙將窆之而柩不肯進其母撫之曰元伯
豈有望耶遂停柩移時乃見有素車白馬號哭而來母
曰是必巨卿也式因執紼而引柩於是乃前

本傳

乞骸歸葬

以下條
歸葬

常玄成嗣封扶陽侯初父賢葬平陵玄成後徙杜陵病且死因使者自白曰不勝父子恩願乞骸骨歸葬父塋上許焉

夢欲歸葬

溫序為護羌校尉為隗囂將所拘伏劍而死主簿從事持尸歸殮光武聞而憐之命送葬到洛陽賜城旁為冢長子壽夢序告曰久客思鄉里壽即棄官上書乞骸骨歸葬帝許之乃返舊塋

見夢歸葬

見遷謫門

助歸葬費

柳子厚之得歸葬也費皆出觀察使河東裴君行立行

立有節概重然諾與子厚結交子厚竟賴其力

墓誌

古今文集

雜著

羸葬書

楊王孫

蓋聞古之聖王緣人情不忍其親故為制禮今則越之

吾是以羸葬將以矯世也夫厚葬誠亡益於死者而俗人競以相高靡財殫幣腐之地下或迺今日入而明日發此真與暴骸於中野何異且夫死者終生之化而物之歸者也歸者得至化者得變是物各反其真又曰精神者天之有也形骸者地之有也精神離形各歸其真故謂之鬼鬼之言歸也其尸塊然獨處寧有知哉裹以幣帛高以棺槨交纏絡束口含玉石欲化不得鬱為枯腊千載之後棺槨朽腐乃得歸土就其真宅由是言之

焉用久客昔帝堯之葬也窆木為櫃葛藟為緘其穿下
不亂泉上不泄殛故聖王生易尚死易葬也

篤終論

皇甫謐

生不能保七尺之軀死何故隔一棺之土然則衣衾所
以穢尸棺槨所以隔真故桓司馬不如速朽季孫璠璵
比之暴骸文公厚葬春秋以為華元不臣漢王孫親土
漢書以為賢於秦始皇夫葬者藏也藏也者欲人不得
見也而大為棺槨備存器物無異埋金路隅而書表於

上也吾氣絕之後便即時服幅巾故衣以蘆簾裹尸擇不毛之地穿坑下尺平生之物皆無自隨唯齋孝經一卷示不忘孝蘆簾之外便以親土若不如比則冤悲沒世長為恨鬼

詩話

留待沈彬

沈彬臨終指葬處以示家人穴其所乃一塚未嘗葬人石燈臺上有漆燈一盞壙頭有一銅碑鐫篆文詩云佳

城今已開雖開不葬埋漆燈猶未滅留待沈彬來

江南野錄

雜著

以下係歸葬

祭崔使君神柩歸上都文 柳宗元

嘻乎崔公之柩嘻乎崔公楚之南其土不可以室或圻而頽或确而萃陰流泄漏藏沒渝溢碩鼠大蟻傍穿側出虧疎脆薄久乃自窒不如君之鄉式堅且密嘻乎崔公楚之南其鬼不可與友躁戾佻險睽眚敗苟脞賤暗習輕囂妄走不思已類好是羣醜不如君之鄉式和且

偶日月其良子姓甚勤具是舟輦寧君之神去爾夷方
返爾故鄰奕奕其歸且樂且忻君死而還我生而留永
矣殊世曷徃之游酌觴於座與涕俱流

律詩

聞故相房公靈輓自閬州啓殯歸葬東都

杜甫

遠聞房太守歸葬陸渾山一德興王後孤魂久客間孔
明多故事安石竟崇班他日嘉陵淚仍霑楚水還

哭嚴僕射歸櫬


杜甫

素幔隨流水歸舟返舊京
老親知宿昔部曲異平生
風送蛟龍雨天長驃騎營
一哀三峽暮遺後見君清

送盧十四護帝尚書櫬歸上都

杜甫

素幘渡江遠朱幡登陸微
悲鳴駟馬顧失涕萬人揮
參佐哭辭畢門闌誰送歸
清霜洞庭菊故就別時飛



古今事文類聚前集卷五十七